

范忠貞公文集

四冊之四

附錄嵇永仁百苦吟原唱

自敘

昔人有言蟲生夢中胞胎悉苦予輩讀聖賢書學經濟事不能
輝煌騰達自行胸臆依附得志者以行其道此亦無聊之極思
矣廼復顛危窮迫偏處幽羈身體髮膚空乏凍餓心志筋骨勞
苦煎熬豈天將有意降之大任耶抑人處憂患之地而後善心
生耶茫茫彼蒼莫能窮詰硜硜一介無惡可爲意者我生不辰
適逢其會歟然運數劫火仙佛唾餘悠悠庸妄無可奈何援此
諉之於命而主持世道者不敢涉也公詩曰誤國媿虛名予每
讀此低徊者久之仁人君子之用心誠不因艱難險阻而輟其

痾瘵悲憫之素志也春來筆墨久廢迴憶兩年親歷諸景啞然
而笑漫然爲之遂成百首用炭屑圖於四壁蓼蟲自語其苦夫
復何異同難二三子應聲而和真情實境不假思索吟者撚鬚
未斷讀者觸心卽酸聊作患難圖繪可也三家村老撲棗打油
尙且流傳閭巷士女謳歌矧予輩之羽翼忠孝砥礪名節者哉
故於詩成而系之以引抱犢山農識

颶風

海國年年起大風于今風勢撼蛟宮瓦飛木拔人摧仆驚起羈
魂碧落中

瘴雨

蠻烟毒霧雨傾盆
溼盡炊烟火不存
絕食淋漓猶禁錮
那能行乞學王孫

積潦

水深三尺釜生萊
人在園中水氣埋
野鷺如何飛不起
波濤平地最堪哀

炎蒸

解慍南風未可欺
爍膚如火烈風吹
炎方豈乏清涼境
煩惱場中扇不宜

凍雪

六尺飛花是瑞胎
三山盈尺作凶猜
連年亂撒鵝毛片
僵煞袁

安做一堆

連陰

積霧沈霾深閉局窺天不放一痕青無端盆覆奇男子愁鎖長
空日氣冥

霉濕

作晴作雨熟梅天江北江南氣候連獨有海隅時序改四時蒸
透破青氊

泥湍

閩俗風光著屐紅不教誤踏在泥中餘生汨汨泥塗內何日登
山倚謝公

昏黑

惱人無賴值黃昏黯黯愁雲易斷魂
晚照桑榆還在目衡門此際逐雞豚

昧旦

每到雞鳴睡不安五更心事半生難
起來怕見猙獰面一枕天涯夢已殘

瞭燈

半明半滅影蒼黃照盡單衾瘦貼牆
一卷維摩猶在手直疑禪舍佛慈光

屋漏

范忠貞公文集附錄
三
滴滴牀頭似淚懸
和泥和水浸衣穿
平生爾室原無媿
不透天邊透雨邊

濕地

避乾就溼似僵魂
枕石終宵氣不溫
左臂至今成痛痺
天留右腕筆空存

負暄

幾時曝背向蓉莊
背負頻年別棘長
凍結鬚眉同北地
南邊如此盼朝陽

旱澡

探湯未熱貯烏盆
勺水人多攪易昏
去垢未曾偏惹垢
羨他江

漢濯冰魂

蓬首

短髮和愁共作絲鏡中搔首歎迷離憑誰櫛沐添憔悴結髮淡
聞知不知

垢面

神瘁形枯霜雪還行年四十笑頹顏何妨面目蒙塵土自有光
明照世間

攣手

誰云醫國補天工盡在淒涼袖手中總怕丹成飛欲去仙人掌
上受牢籠

繫足

踏透層冰不怕寒如何寸步一身難卻緣愛把滄浪濯留與風波局內看

拘項

木吏無言虎踞憑相看頑鐵骨模棱書生不是鴛鴦頸空向星前扣赤繩

枯腸

左圖右史較讐年鄴架名山浩若烟此日著書無半部腹笥搜索愧便便

淚眼

吞聲飲恨不曾乾
漸覺模糊眼力酸
縱有雲山難極望
管中偷把上天看

聞柝

鬧煞延門十甲牌
柝聲敲斷喚巡街
馬蹏猶自頻頻過
攪亂雲山徹夜懷

聽砧

年年不見有寒衣
刀尺聲中歲月非
戍婦至今猶若此
江南淚溼寶家機

鄰哭

白骨如山臥戰場
塵羹土飯悼新亡
近來巷哭多如許
只爲清

明到北邙

風鶴

亂世如絲性命微驚傳消息是耶非如予聽慣齊東語鷗鳥真忘禍福機

礮警

捲地奔雷響徹天危城氣勢觸蠻烟縱教掩耳偷餘息鼠穴驚魂已兩年

簪策

城上鳴鳴畫角聲秋殘春老總傷情千家按籍丁男數一月三迴聽點兵

鞞鼓

馬上鞞鞞道路悲
襦褌拂袖助鐃吹
商聲奏入軍中樂
只合漁陽奮幾槌

笳吹

蘆管吹來日氣寒
邊軍回首望長安
海邦也爲防邊設
地北天南恨一般

吏稽

小吏停軒罪籍呈
乾坤無罪此身輕
令嚴日日來稽察
認作秋闈夜唱名

卒猛

木客山魃結一羣經年耳目鬼紛紜圖將五嶽誰攜佩白澤空中自護君

晝詰

狴犴黑霧罩通衢多少行人悲向隅念舊小奚來訊主毒拳批頰血模糊

夜查

傍晚催人鎖鑰閒琅琅震耳套連環龍鍾不似神蛟怒空費婆心鐵樹關

值班

一波一浪送危帆閱盡潮頭踞石巖變態咆哮千百種直如燕

子語呢喃

交更

暮鼓晨梆日夜嘈挨時記刻較分毫關情不似巡更雁漏盡鐘鳴枉自勞

臭蟲

破柱頽垣黑夜游蘭襟臭味不相投圓圓赤暈浮如粟噬盡頑肌當石頭

蟣蝨

王猛雄談定霸圖懷中捫出只些須誰教肉相非王佐但合供他飽餓夫

飛蠅

予耳常苦
夜蠅飛入

讒言罔極怪青蠅蒙垢生平觸類憎充耳至今聽否慣飛來飛去有何能

遊鼠

鼠曾敲
予足指

陰房日夜走鼯鼯糞土牀前傾食盂茶味不堪供大嚼致教蹂踐到寒軀

聚蚊

炎鄉瘴海聚成雷毒口趨時撲又來巾幘鬚眉筋尙露丈夫體勁不須哀

鬼啾

盡道陰房鬼火森啾啾叫徹五更心欲求雪痛招魂賦我正羈囚痛更深

疫癘

錯亂陰陽氣候乖網羅百口似枯菱霜飛六月知天意傳染如何雪上埋

碎衣

予鄉有貴人哀而饒衣峻拒之

衣裳薜荔未爲貧百結懸鶉耐幾春磨盡生平窮骨健傲他裘馬少年人

破被

買就零星敗絮來遮身此夜凍初回黑甜鄉裏還家夢不信天

涯作死灰

砂鍋

甌破何勞顧盼爲搏泥鑽火亦成炊庖犧五味從中別甘苦心
脾只自知

泥爐

焚檀灸桂夢徒然爇盡寒灰楫桡烟七十老翁愁足冷三冬夜
夜傍他眠

瓦盆

孟水盤飧野老風齏鹽啖盡有時空雖然易破猶能買留作堯
衢鼓缶翁